

## DOMENIE VII «VIE PAL AN»

### Antifone di jentrade Sal 12,6

**I**ntal to boncûr, Signôr, o ài vude fede;  
che si indalegri il gno cûr te tô salvece.  
I cjantarai al Signôr che mi à judât.

### Colete

Diu onipotent, danus la gracie  
di meditâ simpri ce che al è just,  
par podê fâ, cu lis peraulis e cu lis voris, lis robis che ti plasin.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Is 43,18-19.21-22.24b-25

**Pal gno onôr no mi visarai plui dai tiei pecjâts.**

Dal libri dal profete Isaie  
Cussì al dîs il Signôr:  
«No stait a pensâ plui a lis robis di une volte,  
no stait a bacilâ plui pes robis vieris.  
Ve, o fâs une robe gnove,  
si sta za inmaneant, no lu viodêso?  
Propit, o vierzarai une strade tal desert,  
o metarai flums inte pustote.  
Il popul che mi ài metût adun par me  
al cjantarà lui la mê laut.  
E tu, Jacop, no tu mi âs clamât,  
che anzit tu ti sês stufât di me, Israel!  
Tu mi âs sumierzût cui tiei pecjâts  
e tu mi âs stufât cu lis tôs tristeriis.  
O soi jo, o soi jo che o pari jù lis tôs inicitâts,  
pal gno onôr, e no mi visarai plui dai tiei pecjâts».  
Peraule di Diu.

### SALM RESPONSORIÂL dal Salm 40

**R.** Fasinus tornâ gnûfs, Signôr, cul to perdon.

Furtunât l'om che al à passion pal puar:  
il Signôr lu liberarà te di de sô disgracie.  
Il Signôr lu vuardarà e i darà vite,  
lu fasarà content su la tiere,  
e no lu molarà tes mans dai siei nemîs. **R.**

Il Signôr lu tignarà sù tal jet dal dolôr,  
lu solevarà inte sô malatie.  
O ài dite: «Di me ve dûl,  
vuaris la mê anime, parcè che cuintri di te o ài pecjât». **R.**

Ma me tu mi tignarâs sù par vie de mê innocence  
e tu mi fasarâs stâ denant di te par simpri.  
Benedet seial il Signôr, Diu di Israel,  
di simpri e par simpri. Amen! Amen! **R.**

## SECONDE LETURE 2 Cor 1,18-22

Jesù nol è stât «sì» e «no», ma in lui al è stât dome il «sì».

De seconde letare di san Pauli apuestul ai Corints

Fradis, come che al è vêr che Diu al è di peraule, la nestre peraule tai vuestris confronts no je «sì» e «no»! Parcè che il Fi di Diu, Jesù Crist che al è stât predicjât framieç di vualtris, di me, di Silvan e di Timoteu, nol è stât «sì» e «no», ma in lui al è stât dome il «sì».

In lui dutis lis promessis di Diu a son diventadis «sì». Par chest, midiant di lui, al va sù a Diu ancje il nestri «Amen», pe sô glorie. E Diu stes nus conferme, insiemi cun vualtris, in Crist, e nus à onzûts e nus à dât il sigjîl e la capare dal Spirt tai nestris cûrs.

Peraule di Diu.

## CJANT AL VANZELI cf. Zn 17,17

R. Aleluia, aleluia.

La tô peraule, Signôr, e je veretât:  
fasinus sants tal to bonvolê.

R. Aleluia.

o ben: Lc 4,18

R. Aleluia, aleluia.

Il Signôr mi à madât  
a quartâur ai puars la buine gnove,  
a contâur ai presonîrs che a son libars.

R. Aleluia.

## VANZELI Mc 2,1-12

Il Fi dal om al à il podê di parâ jù i pecjâts.

Dal vanzeli seont Marc

Dopo cualchi dì, Jesù al jentrà di gnûf a Cafarnau. Si vignè a savê che al jere in cjase e e corè tante di chê int che nol jere plui puest, nancje denant de puarte, biel che lui al predicjave la peraule. A rivarin di lui ancje cuntun paralitic, quartât di cuatri oms. Ma, stant che no podevin lâ dongje di lui par vie de tante int, a distaponarin il cuviert juste parsore di lui e, fate une buse, a molarin jù il jetut là che al jere distirât il paralitic. Alore Jesù, viodint la lôr fede, i disè al paralitic: «Fi, i tiei pecjâts ti son parâts jù».

A jerin li un pôcs di scrituriscj che, stant sentâts, a pensavin intai lôr cûrs: «Cemût mai che chest om al fevele cussì? Chel chi al blesteme! Cui puedial parâ jù i pecjâts, se no dome Diu?». Ma Jesù, cognossût a colp intal so spirt che le pensavin cussì, ur dîs: «Parcè mo pensaiso chestis robis intai vuestris cûrs? Ce isal plui facil: dîi al paralitic: I tiei pecjâts ti son parâts jù, o dîi: Jeve sù, cjape sù il to jetut e cjamine? Ma par che o savês che il Fi dal om al à il podê di parâ jù i pecjâts su la tiere – i dîs al paralitic –: Tal dîs a ti! Jeve, cjape sù il to jetut e va a cjase tô». Alorechel al jevâ sù, al spesseà a cjapâ sù il jetut e al jessì sot i vôi di ducj; si che ducj a restarin scaturîts e a laudavin Diu disint: «No vin mai viodude une robe compagne!».

Peraule dal Signôr.

## Su lis ufiertis

Celebrant i tiei misteris cul rivuart che a mertin,  
ti preìn, Signôr,  
che al zovi pe nestre salvece  
ce che o ufrìn in onôr de tô maiestât.  
Par Crist nestri Signôr.

**Antifone a la comunion Sal 9,2-3**

O vœi contâ dutis lis robonis che tu âs fatis.  
O vœi jessi content e plen di ligrie,  
o vœi cjantâ il to non, Altissim.

**O ben: Zn 11,27**

Signôr, jo o ài crodût che tu tu sês il Crist,  
il Fi dal Diu vîf, chel che al à di vignî tal mont.

**Daspò de comunion**

Diu onipotent, danus par plasê di rivâ a chê salvece  
che midiant di chescj misteris  
o vin vude la capare.  
Par Crist nestri Signôr.